



საქართველოს თავდაცვის მინისტრის
ბრძანება

ქ. თბილისი



MOD 2 20 00000231

12/03/2020

საქართველოში ახალი კორონავირუსის შესაძლო გავრცელების
აღკვეთის ღონისძიებების განსაზღვრის შესახებ

საქართველოს ზოგადი ადმინისტრაციული კოდექსის 61-ე მუხლის თანახმად, საქართველოს მთავრობის 2018 წლის 12 დეკემბრის N580 დადგენილებით დამტკიცებული „საქართველოს თავდაცვის სამინისტროს დებულების“ მე-3 მუხლის მე-4 პუნქტის „ე“ ქვეპუნქტის საფუძველზე,

ვ ბ რ ძ ა ნ ე ბ ა:

1. საქართველოში ახალი კორონავირუსის (შემდგომში - კორონავირუსი) შესაძლო გავრცელების აღკვეთის მიზნით, არ გამოცხადდეს სამსახურში:

ა) საქართველოში დაბრუნებიდან ორი კვირის განმავლობაში, საქართველოს თავდაცვის სამინისტროს (შემდგომში - სამინისტრო) ის მოსამსახურე:

ა.ა) რომელიც ამ ბრძანების გამოცემამდე ბოლო ორი კვირის მანძილზე იმყოფებოდა ქვეყნის ფარგლებს გარეთ;

ა.ბ) რომლის ოჯახის წევრი იმყოფებოდა საზღვარგარეთ;

ა.გ) რომელთანაც კონტაქტი ჰქონდა უცხო ქვეყნიდან ჩამოსულ პირს.

ბ) მოსამსახურე, რომელსაც ჰქონდა პირდაპირი ან ირიბი კონტაქტი, როგორც პირადად, ასევე ოჯახის წევრის მეშვეობით იმ პირთან, რომელიც იმყოფება თვითიზოლაციაში ან კარანტინში ან დაუდასტურდა კორონავირუსი;

გ) გრიპისმაგვარი დაავადების ან მწვავე რესპირატორული ინფექციის სიმპტომების მქონე პირი შესაბამისი სტრუქტურული ქვედანაყოფის ხელმძღვანელის ინფორმირებით შემდგომ განკარგულებამდე;

დ) ორსული ქალი შემდგომ განკარგულებამდე;

ე) ქრონიკული დაავადების მქონე/სხვადასხვა სახის იმუნოდეფიციტის მქონე პირი შესაბამისი სტრუქტურული ქვედანაყოფის ხელმძღვანელთან შეთანხმებით შემდგომ განკარგულებამდე.

2. საქართველოს თავდაცვის მინისტრის გადაწყვეტილებით შესაბამისმა მოსამსახურეებმა სამუშაო შეასრულონ დისტანციურად, უშუალო ხელმძღვანელის მიერ გაცემული დავალებების შესაბამისად.

3. ამ ბრძანების პირველ პუნქტში მითითებულ პირს დაევალოს:

ა) შესაბამისი სამედიცინო დაწესებულებისთვის მიმართვა;

ბ) უშუალო ხელმძღვანელის ინფორმირება.

4. სამინისტროს მოსამსახურეს დაევალოს საზღვარგარეთ დაგეგმილი პირადი ვიზიტის შესახებ აცნობოს უშუალო ხელმძღვანელს.

5. სამინისტროს მოსამსახურეებს დაევალოს ბრძანებაზე თანდართული კითხვარის (N1 დანართი) შევსება და შესაბამისი ინსტრუქციის (N2 დანართი) გაცნობა.

6. გაეწიოს რეკომენდაცია სამინისტროს მოსამსახურეებს თავი აარიდონ საზოგადოებრივი თავშეყრის ადგილებს.

7. დაევალოს:

ა) საქართველოს თავდაცვის სამინისტროს ადამიანური რესურსების დეპარტამენტს და საქართველოს თავდაცვის ძალების გენერალური შტაბის სამხედრო პერსონალის მართვის ცენტრს უზრუნველყონ მივლინებების გაუქმებისთვის/გადადებისთვის სათანადო ღონისძიებების განხორციელება შემდგომ განკარგულებამდე;

ბ) სამინისტროს სისტემაში შემავალ საჯარო სამართლის იურიდიულ პირებს უზრუნველყონ ამ ბრძანების მიზნების გათვალისწინებით, ანალოგიური შინაარსის ბრძანების გამოცემისათვის საჭირო ღონისძიებების გატარება;

გ) სამინისტროს ყველა სტრუქტურული ქვედანაყოფის ხელმძღვანელს უზრუნველყოს ამ ბრძანების მიზნებისთვის გათავისუფლებული და დისტანციურად მომუშავე თანამშრომლების შესახებ ინფორმაციის მიწოდება საქართველოს თავდაცვის ძალების გენერალური შტაბის J-3 ოპერატიული დაგეგმვის დეპარტამენტის სამხედრო მართვის ცენტრისათვის.

8. ამ ბრძანების პირველი პუნქტის „ა“, „ბ“ და „გ“ ქვეპუნქტებში განსაზღვრული მოსამსახურეების მიერ ბრძანების შეუსრულებლობა და თვითიზოლაციაში ყოფნის წესების დარღვევა გამოიწვევს სამსახურიდან დათხოვნას. ასევე, შესაძლოა გამოიწვიოს საქართველოს სისხლის სამართლის კოდექსის 132-ე მუხლით გათვალისწინებული პასუხისმგებლობა.

9. დაევალოს საქართველოს თავდაცვის ძალების სამხედრო პოლიციის დეპარტამენტს სამინისტროს სისტემის თვითიზოლაციაში მყოფი მოსამსახურეების მიერ შესაბამისი წესების დაცვის კონტროლი.

10. ამ ბრძანების პირველ და მე-2 პუნქტში მითითებულ მოსამსახურეს შეუნარჩუნდეს შრომის ანაზღაურება.

11. კონტროლი ბრძანების შესრულებაზე დაევალოს საქართველოს თავდაცვის მინისტრის პირველ მოადგილეს ლელა ჩიქოვანს და საქართველოს თავდაცვის ძალების მეთაურის მოვალეობის შემსრულებელს გენერალ-მაიორ ზაზა ჩხაიძეს.

12. ბრძანებას გაეცნოს სამინისტროს ყველა მოსამსახურე.

13. ძალადაკარგულად გამოცხადდეს „საქართველოში ახალი კორონავირუსის შესაძლო გავრცელების აღკვეთის ღონისძიებების განსაზღვრის შესახებ“ საქართველოს თავდაცვის მინისტრის 2020 წლის 4 მარტის N MOD 9 20 00000210 ბრძანება.

14. ბრძანება ძალაშია ხელმოწერის დღიდან.

მინისტრი
ირაკლი ღარიბაშვილი

